

陳眉公集

陳眉公集卷之十六

雲間陳繼儒仲醇著

誄祭文

范牧之誄

有敘

余友范牧之材有稜岸駒齒未落剪剪軼人得其噭  
笑判爲榮辱然獨傾交吾黨酣肆橫溢如張百全之  
軍援厚盟堅縱馳衡擊已無千載矣可不然諾一言  
于鈞似俠冲退歛約多與寡忤似老淋漓簸弄縱恣  
歡適似玩丁家艱時而如深墨骨如枯柴溢米勺漿

存性而已才之果毅勝堅可與適道孰有如牧之者乎牧之亦雅自負將盡展厥緒益亢其宗顧幹局趨敏性如俊鶴一撲不勝便欲颺去落落久之迺始爲倘悅自放之說慨然曰昔者顏回夭折躋跡眉壽伯夷窶貧齊景豐厚孔子老行陽虎賈寵人之賢不肖寧在通塞間與夫旣已受造化鎔鑄而猶爭之將爲躍治之金邪時牧之意實慘黯謬稱說以自廣耳後稍娛意觴詠與客陸博樗蒲踴射覆醉或長嘯大呼激氣引聲洩其不平若欲爲晉宋逸人嵇阮陶謝

輩者間令吳娃度新聲意有不憚輒攢眉曰鬼而粉  
墨矣且中人截袖而出疾不及影後游平康獨有所  
遇淹繫旬月無復顧禮牧之爲此是操太阿者耻不  
當犀兕廻薄之柱石而擊之使化爲百也於是吾黨  
咸褰衣峩冠振纓理馬進而莊語牧之不可則又叢  
謂聳譏目眦盡裂又不可則相與要之神謀掃軌割  
案以附鳴鼓牧之廻愴然自失爲書以謝其畧曰僕  
聞虧名爲辱虧形次之諸君子具當世賢者僕雖不  
才忝惠莊之遇舊矣諸君子一日攝齊束帶矢之神

前擊鐘伐鼓焚香齋天以絕鄙人一時觀者莫不駭  
遽狂走謂僕當得夷族之禍以至於此甚而造作端  
未飛流短長筆之隃靡付之尸祝無煩檢考遽定爰  
書不須左驗遂成文案是忠告之義同於擿缺據摭  
之過近於文致使僕不能含生於覆載強息於人世  
辱云甚矣僕亦何人其能甘之惟有蹈東海而死耳  
嗟乎牧之之言何其悲也易曰憂虞莫大乎悔吝是  
故從善不遂吝之端也蹈過知險悔之用也牧之旣  
謝吾黨乃不明言痛斥尤物其悔吝之介乎居無何

則買長舸載之爲乃祖鴟夷之游而牧之玉碎矣吾黨無須化之術激而蹙之幽冥之中負吾良友乃爲之誄誄者古人以臨哀雪涕於義當爾誄曰

嗚呼哀哉牧之之生夙稟靈氣金蕤吐芒瓊禾秀穗  
顚角初整骨骼亦張眉昂氣激詩襟禮裳駛颶早馳  
鷹隼初飈旣抱介特卑庸寡與敦惠同好金蘭木李  
浮游商周溯觀無始廼風廼雅亦玄亦史竹間七人  
濠上二子情愫固優道義實篤循理成途趨仁展軸  
於時侃侃先民之躅賦性寥廓深情必鍾麗譙落月

猶邪春風草映細馬波迴驚鴻渡頭桃葉山際芙蓉  
艾圃之戾戾於厭躬鬱然璠璵惜此纖翳危言苦辭  
我用砥礪皎日矢心清霜隕涕無忝久要以附斯誼  
吾聞攻玉必有其方漸摩浸假不阿不強憶維吾黨  
適乖其常石質頑確玉資堅剛力爭不勝咄哉俱傷  
嗚呼哀哉

陸百之誄

明故鄉進士華亭陸君百之者贈太子太保平泉公  
之猶子中丞阜南公之冢孫吏部考功中陽公之子

也長自世胄不期加潤生居淵廣匪挹彌冲其在舞  
象則使張伯饒愧請益之功黃子琰慙對月之敏乃  
遂志擬絕編名高領薦會北上春官次于逆旅勞疾  
弗任遂至顛隕痛哉次公九之義纏友于恪殫後事  
生死無憾識者義之猶復顧瞻斷影哀切在原邀作  
誄詞以寫至痛陳子爲之誄日起漢季崩離寢縣零  
濁三方鼎峙四姓名族分胙華亭爲吳邦陸機雲而  
後厥胤昌淑宮保篤老中丞莊敬考功競爽人文交  
映誕生我君清瀾淵鏡履端初學躬親灑汎在聰稱

敏應對則俊磨礪砥礪雷豫乃奮逮事皇考庭趨輦  
轂出業入寢師資是勗閉捷下帷筆花帛竹禮義之  
淵旣膏且沐浴輪拂枕盡瘁夙夜屏攝聲氣局跡子  
舍侍疾羈月解帶無暇考功捐館泣若孺啼柴毀骨  
立杖不能携相塚作丘茀草灑泥佳氣鬱葱松檳迷  
離孝鳥馴兔來止來栖兄弟怡怡矢言則一棠棣念  
存荆樹戒折時雖倥偬務殫心力允協會同糾難違  
遜孝徵色難沒秉遺馴貞姑逆養義倉給運助三貸  
七莫非我分名公之孫名父之子溫潤怡和如璞未

理綺歲成名才譽鵲起曹營友邗悉奉鞭弭一入留  
都朝霞散綺上公掃門國士倒屣竟體芳蘭雙眸秋  
水迎謂陸郎二俊未死載塗雨雪北上春官問關道  
路不任羽翰寢疚旅邸委頓而還還無幾何醫技告  
單弱第急難捐廢寢餐額帝叩神淚化爲丹綱紀喪  
葬雕心鐫肝拮据一丘其宅孔安嗚呼哀哉東南之  
美天下之寶玉碎珠沉蘭枯蕙稿凡厥有情莫不愴  
嘆矧余通家怒焉如擣人誰不死子死太皓冥路何  
長生趣何促阿閃國中浪花風燭來也何緣去也何

觸芙蓉劍埋鬼母夜哭桃花駿死龍種不育天耶數  
耶誰鬼誰鵠修短俱盡君盍瞑目蒼蒼涼涼水枯草  
宿吾誅素旛永衛樵牧嗚呼哀哉

行狀

尚寶司丞龍海顧先生行狀

顧之先有仲實公有四丈夫子曰子富子貴子榮子  
華富居崑山里仲實攜子貴子榮子華徙海上而居  
皆以布衣樹誼子貴生文彬彬生綱綱生懷松公瑜  
而顧宗始拓瑜生景高公配泰安人生子二伯鄧州

龍山公仲卽先生先生諱名泄字應夫號龍海少而  
岐嶷有夙慧懷松公絕奇愛之曰吾大者琳琅小者  
玉樹顧其興乎先生髫年景高公捐館舍依母太夫  
人誦讀太夫人從機絲中課之燈火熒熒至丙夜不  
輟聲與杼韻甫束髮兼通今古文名鵠起蓋弱冠遂  
補博士弟子彌銳精討上探竹書下綜鴻寶旁及諸  
子百家及稗官野史日以五色丹鉛手爲批註至  
是其文大成而亦往往大與時左久困諸生間然神  
愈王讀書愈益力終不肯少自貶損與時俛仰所交

率天下賢豪一言抵合卽寒士必嘔肝折腸不然寧  
取訕詬意揚揚強項不下也故里中有更相齧嚼以  
浮語陰伺先生而螫之者幾中禍會督學使馮公嘗  
先生文且心知其冤得白自後輒試輒哀然居首然  
時時爲棘闈所蹶竊自嘆曰吾志行非不慕古人奈  
何年至此而又局局作轅下態也豈固命耶雖然伏  
波老矣收功桑榆丞相弘公車三上取通侯印如斗  
大大丈夫誠有志肯以千里骨坐朽伏櫪間哉公日  
則倒履迎客酒槍詩卷圍棊陸博俛首而角少年之

戲日落客散焚香挑燈翛然讀書童子鼾睡几榻傍  
如數部鼓吹公琅琅耳弗聞目弗睫也比寢起門者  
已納客復觴咏如故矣人以此調先生先生笑曰我  
壯夫也雄心難降我故以杯酒一澆罍塊且以詩酒  
三分之一足辦吾事勿復言無何閩中黃公來校士  
以先生冠諸生曰吾意子久薄雲霄今尚匏繫一老  
博士手中然今秋之役定無先子嗚奚是歲果以詩  
高魁南服公車下第還上海受倭城且潰先生銳然  
率洞列登陴分門死守倭竟遁去城乃得完未幾成

已未進士授工部分司武林南關貢額外未嘗私取  
贏錢豪猾股栗不敢爲非旣去而商民思之爲立  
石焉已遷本部員外郎歷轉武選郎中門署如洗一  
切苞苴干牘悉屏不入所遷序務擇有功足驅使者  
故是時邊疆甲士號稱得人文貞公當國欲以銀臺  
處先生先生辭遂遷尚寶丞奉璽書稱使者以桐  
圭出封親藩府賜賚悉珍異非恒品先生頓首謝曰  
臣竚朝命而敢徼寵賂于外三尺之謂何空橐出  
飽橐入亦何顏還都門見都人士哉遂不受竣事旋

車道出鄧州故伯氏龍山公所守也先生相遇甚驩飲酒酣舉觴謂伯氏曰第身爲卿丞捧符璽引

天子上殿拱立御座側而兄亦綰刺史綬章稱榮矣然兩兄弟循顛髮而上則種種如雪乃腰肢僵僂日踉蹌諸貴人前苟戀戀頭上一冠恐猿鶴笑我矣青松白石無寒此盟未幾龍山公投轄去先生亦未幾請于朝歸老兩兄弟老而抱持喜可知也于是買城隅曠地累山鑿泉種魚洗竹亭臺橋榭具體而微公與伯氏娑娑游息其中日無虛客客無虛觴天

青露白花落易來杖履所至望者以爲神仙少喜奕  
晚年則召客對奕而身置其傍從容指點徐策其勝  
敗如是者終身無倦容然益簡遠絕不敢造請公庭  
至後輩以文章見投則啓闕相覲欣然下榻忘其老  
之將至也公生于正德丁卯十二月二十六日卒于  
萬曆戊子十月初八日娶郁氏繼談氏俱封安人子  
三長箕英太學生談安人出娶方伯喬純所公女次  
斗英邑庠生娶海澄尹瞿永山女次奎英側室出娶  
孝廉戴水玄女斗英爲龍山公後女七長適龍江孫

唐繼勲次適恭定公子太學生潘允肅次適沈侍御  
子紹侁次適倪孝廉子太學生家胤次適庠生劉永  
鼎次受徐士充子以倬聘次受庠生趙光祖子季枝  
聘孫男三長芝雲次芝玉芝室俱箕英出倜儻有才  
名多父風能世其家以萬曆己丑十二月二十四日  
扶先生柩葬長涇之原走華亭乞狀于不佞不佞之  
生晚雖未辱知于先生而與先生伯子箕英實有金  
蘭之契故爲之銓次如左以俟當世君子採擇而賜  
之不朽焉

書陳穉登交情始末

無錫陳穉登之亡也栢潭孫公涇陽顧公狀而志之而唐元徵董玄宰王辰玉皆各爲之傳其子藝之又以穉登遺書訣余余更白練衣爲位而拜啓其書淚浹于睫而不能讀也嗚呼痛哉初穉登入南雍新都許相國爲祭酒新建張相國爲司業一時所賞識傾天下知名之士而獨愛重穉登與吾士友徐長孺長孺歸而謂余南中有大儒及奇男子各一人則武進徐倣絃涇上陳穉登也徐公名宿顧心降穉登蓋其

人豪似元龍俠似孟公推倒一世似同父余退而私志之甲申穉登走華亭訪余余方與辰玉讀書婁水而穉登亦欲謁文于弇州太原兩王家至是始相遇甚得別去己丑余與徐長孺會葬于顧墓因訪穉登穉登出子弟見余流連日夜鍵門不得歸迫余賦詩又屬余撰祠堂記因導入祠中掃除靚潔肅如官府自不肖歲時饋奠吾婦手浣鑄釜而進之一夕婦不戒于鼠而不肖禮必以昧爽上食婦倉卒不能辨爲易它饋不肖爾時當神主前不可以謂讓婦伏地責

無狀哭不起吾婦聞之懼幾若無以自容者累日既  
而出饌饌余甚旨而整及余童子行則間雜酒脯枯  
魚麥飯以佐之余以是心知談孺人賢又知穉登之  
恭儉而有禮能行于妻子也自後與穉登不數見歲  
以書往來而一日雨中薄暮跡余于秀州之南園余  
門生皆以得見稱登爲快穉登方從北雍下第歸俯  
仰默默旣而燃燭進酒忽岸然謂余曰我北游無所  
遇顧喜見李如松大將軍霍霍贍畧有名將風顧叔  
時爲文選恂恂如書生閉門清潔不通針芥顧益卿

司馬時時以酒錢寄我我得緩急人且使者言遼陽  
黃鬚兒皆折箭相戒不敢犯塞上是皆長安中可喜  
事其餘馬蹄碌碌惟有埋人十丈塵耳穉登時已大  
醉復命洛科頭坐余榻間滾滾論文史旁策國事反  
覆及夜半皆可喜至明日邀余送之十里外雨蓬之  
下探詩草奏余一讀一笑鬚眉奮張臨別復邀余贈  
一歌乃釋此乙未八月十六日也嗚呼孰意此日乃  
與穉登訣耶穉登長余七歲余多病穉登壯旺有精  
魄尚未衰余見人退縮而穉登賓至如歸以穉登之

年與才心敝志得與當世將相及四方文章豪士酣  
嬉淋漓何所不樹立而落落卒不遇以死其死又僅  
四十有九是可惜也穉登忠直孝友能信于里族里  
族無太小不之官府而之穉登一言以爲解生平視  
交情最真其待王崑崙先生始終執世講子姪禮最  
謹顧司馬嘗折東崑崙招爲薊門游崑崙行別穉登  
置酒送之已復念其老不任遠道爲掩抑泣下崑崙  
卽時慷慨罷裝顧司馬以不能致崑崙也乃馳百金  
爲王先生壽天下聞而咸高之今春崑崙以穉登病

告余以爲卽病不必死未幾哭穉登計矣又未幾且哭王先生柩矣張新建已解相印去顧司馬與涇陽兄弟皆歸卧矣李大將軍戰沒矣曩與君南雍同遊者如微絃長孺皆先亡卽許相國墓頭之草黃且墮者又不知凡幾歲矣大抵人生如奕碁遍生遍死遍合遍離此無足怪然必局終而後國手乃見今下子方酣半道而撤非獨奕者負恨卽旁觀亦爲之嘆息不已嗟乎穉登豈特余一人區區知已之痛而已哉幸而可以不朽吾穉登者有諸君子之志狀表傳在

余特記其交道之始末以示吾兩家子孫各有考焉

祭文

祭徐澤夫

嗚呼藏丹於壑孰之能守夜半有力負之而走所負  
伊何澤夫分手訣絕已來四十有九憶昔好古縱計  
無酒憶昔酒後烏烏擊缶憶昔操觚肝腸欲嘔憶昔  
附義五內可剖憶昔談禪若獅子吼憶昔窮玄若游  
龍叟憶昔賑施心必應口憶昔論交要必白首請事  
斯語昔者吾友何期今日柳生於肘賦作子虛化爲

烏有以泣以奠澤夫知否君而有知見我一觴其忍  
舉之君而無知卽此一觴醉亦何爲我將求君於十  
七新堂素帷丹旐空爾翕張我將求君老親之側但  
聞哀鳴不見其跡我將求君或水西園野鳥悲啼桃  
李不言我將求君金陵白門六朝絃管嘯歌無人鳴  
呼君竟何來君竟何去上下求之塊然天地徒有遺  
書蠹魚章句徒有遺胤雪涕如雨嗟夫澤夫而竟已  
矣

祭吳母文

表哉黃山自雲丹霞眷焉反顧孺人之家曾違厥家  
以從厥子視時精著吳淞之涘賈而十倍居業靡遷  
不足非財以樂余年盤有甘毳笥有綺縠歲時伏臘  
烹羔廬鹿芝蘭之秀羅于中庭彩而舞者上壽百齡  
文學先生以及里巷莫不休嘉幸甚神王豈惟壽康  
亦有令聞葺城之東畏壘斯存魏母不來婺星不耀  
殄茲賢燼何天不弔丹旌前揚素帷後張冕今翩翩  
返于故鄉荔支焦肯再拜以祖縞衣白剗于河之濱

祭張母文

嗚呼南嶽星冥而池雲冷上鑽天門下窺人竟爰相  
夫君閭範肅整整禮服有盈籩豆無梗泣彼坤儀旣柔  
而靜誕肇賢喆有憐其華河湯春樹勾漏丹砂佐郡  
執法秉憲觸邪黼黻盛世羽儀王家天子曰俞朕居  
中央握機執樞運于四方鑒觀爾嗣克洪厥章伊何  
能穀母氏孔良用錫爾祉錦衣雀裳世崇委蛇嗣熙  
箕屑伏羲作城路道爲轍四維是明百鍊不折桂冠  
東歸脫若秋葉賢哉大夫洩洩融融洗爵上壽惟母  
與翁吳天降割婺女墮空去何之兮蓋珠之官沙淹

明璫苔生寶瑟十月悲風悼彼玄宅枯楊夜號芳簾  
無色嗟爾令子日月有赤省臺上書田杜旣白億萬  
斯年永妥幽魄有鳳者雛有龍者孫三槐奕葉五桂  
纊紛繩乃祖武世其家聲翼此清淑繁誰之橫念我  
弱女母別皇姑如攀高松而抱女蘿松旣萎折蘿可  
柰何械辭縮酒洒爾丘阿白蘋非襄英靈可呼

祭王和石

和

嗚呼先生居今之世爲古之人悠悠世途莫知苦心  
擇地而蹈循牆而行譬彼墨守不失規繩南省含香

中州秉鐸挂冠東歸爰得三樂三樂未幾百憂以煎  
數月之前公嘗有言鰥寡孤獨我居其三余則謂公  
語不云乎天不汝從人將柰何公于此時笑而點首  
寧謂今日酬公以酒生則無壽沒則無後禍福倒持  
陰陽頗謬嗚呼哀哉公亦人子生死異路不見其母  
終天之苦公亦人第永訣告終不見其兄生人之窮  
逸牀而號望影而祭賴有仲子事公以禮此脉可存  
血食有主百歲千秋公祀不餕嗚呼哀哉遺書在牀  
遺像在堂靈帷綏綏載翕載張漆燈熒熒載玄載黃

入止夜靜如嘆於傍公之妻京路人所傷况如我者  
國士之腸無以慰公清酒一觴竟兮歸來殘月微霜

祭高旭崖文

代

嗚呼妹丈樹德孔揚性旣正直氣自溫良惠愛友于  
周隣睦鄉怒不至詈戲不涉狂口無兼味體無麗裳  
草衣蔬食執親之喪孝弟忠信居家之常解紛排難  
三言足當放歌彈鋏千金若忘爲壻寒門行篤且臧  
有時釀醴燕兄弟傳經教子挑燭聯牀子也英特  
翩翩于庠孫枝蘭茂業用寢昌謂宜榮考春秋彌長

天何遽奪未稀爲殃松摧桂拆珠沉玉藏鳬雁嗚呌  
雲烟慘傷嗚呼妹丈仙路杳茫抑游崑崙而登闔閭  
某等內第渥誼靡量今其已矣灑淚汪汪敬奠椒酒  
哀辭是將

祭徐相公文

嗚呼相公之生騎日御月鞭雷策霆前翼後衛下離  
天門相公之度春風孕和冬月遜溫未琢者璞不雕  
若金相公之學飲流酌源披華茹英洙泗之壇濂洛  
之庭相公之文吐納雲霞杼柚星辰金匱丹書石函

洞經相公之功心繫九廟德奠三靈龍袞補闕麟閣  
繪形相公之子鳴鑾佩玉綰紱垂纓三槐奕葉五桂  
續紛相公之孫卷舒白雲翔青雲繩爾祖武世其  
家聲相公之歸鄴架圖書洛社琴尊巍矣國寶卓哉  
鄉評相公之壽豹文愈變雀算彌尊黃封紫誥飛錫  
王京何不昊天億萬其齡爰揮羽旄爰曳霓旌躬逐  
赤霄神遊紫清天地震悼神人涕零林木若號禽鳥  
欲鳴其也官牆私淑几杖親承摶衣梓邑憑軾棠陰  
覲乃聖矩剽其德音揭白而示莫喻其明懸河而流

孰究其深拜謝公教敬以書紳玉山既倒水谷無春  
感深國士淚灑喆人澗毛匪茹江尊可歆酌此清酒  
奠于歲星

祭王元美先生文

我明攘夷頓還二曜微于文章殘氣莫掃奈何崛起  
全力芟夷譬之勝廣斬木揭旗以詩龍準非公其誰  
公與于鱗焚舟而濟初爲敵國晚難兄弟公之虛左  
亦有深意以大事小菜羹必察侍玉皇案遂稱黃冠  
公不黃冠胡寧不仙游金馬門遂稱司寇公不司寇

胡寧不朽出亦無意處亦無心若空嘯風若山吐雲  
至人之路孰得而尋儒者治外三氏治內彌縫其間  
兀然一醉天地夢緣古今游氣香山子瞻差足聯類  
脊山老矣猶恨無兒公之階庭玉樹參差子瞻半生  
頭白窮海公擁弇州得自在自曰行院蘇曰抑衡  
眉以爲多愚以爲誇詎如我公談笑逝耶不戀空果  
况復空花今于空中何以雪涕所不遺者國士之淚  
又于空中何以悲慟所難割者斯文之痛

祭包心韋文

嗚呼一片乾坤兩丸日月送盡英雄頭白如雪亦夜  
吾兄未白而殞石火電光槿花朝菌我之交兄由兄  
大夫忘年忘分小友見呼兄遂買棹訪我菰廬人生  
之樂莫樂新知兄之知我非止文詞親之所愛兄亦  
愛之從此與兄笑而莫遲兩無媿心亦無媿心歲寒  
之盟庶幾無斁何期須臾奪以暴疾聞兄大夫夢有  
識兆兄遂割筭續親考鳴鍾擊鼓叩神露禱遂獲所  
請中道而夭人孰無死兄死何早人孰無死兄死于  
孝兄乎足矣夫復奚悼所可痛者兄有遺書塵積滿

牀所可念者兄有遺胤影弔空堂性喜義俠解紛息  
爭誰如兄者爲俗干城性喜好施賑孤恤苦誰如兄  
者爲人外府以兄之器芙蓉寶鐸千金未售神銷光  
落以兄之才桃花寶騎千里未馳鬢枯纓墜客歲仲  
秋落羽南旋我來慰兄手眎一編嘆息不遇壯士無  
顏我心許兄梓之以傳削劂甫就竟焚柩前嗚呼哀  
哉聞兄訃時長嫂尚在久而不弔意蓋有待兄旣先  
逝長孺復歿朋好幾何零落殆絕辟彼中天曉星殘  
月感念君子百憂中結

祭朱孺人文

嗚呼瑤池竹冷南岳花明爲西王母爲魏夫人或居  
名府或掌靈山各有司存孰來人問勘校霞篇檢閱  
玄鑑爰擇令德爲母之鵠令德伊何寔維朱母環珮  
羽旄麗于下土法彼坤儀矢其德音邊豆無梗禮儀  
有盈雪殘閉戶雨暗桃燈式穀爾後蔚爲聞人射策  
軒墀首冠多士酒綠花紅頻煩宮使玉皇香案金馬  
秘書甘泉朱雁天祿青藜帝曰麻哉朕居中央握机  
蹈杼運于四方監觀爾嗣充稱厥選揆考本源母氏

聖善何不少須爾綸爾誥  
燁燁白雲翩翩青鳥大壑  
蓬壺神仙所都靈爽復去其歸此乎其本年家誼若  
兄弟豈無一杯奠于靈几酌此椒酒採此蘋花含意  
未申零涕如麻

祭朱月溪代

嗟乎滔滔不返東流浩波長繩不繫西飛赤鳥朝悲  
葬董夕陽蟪蛄觀化易及哀我人徒嗟惟朱公令德  
淳龐如玉隱璞不暴其光春馳坦度樂易溫良家安  
孝多里挹瓊芳形夷貿市情古豪莊念昔先人性稟

嚴毅慎擇與可不苟諧契白髮縊交惟君兄弟分參  
絲蘿情誼切至公推餘愛以及小子兩世通家形忘  
彼此我從西來君東延跋園列時榮華堂羅綺飲誰  
通宵賓朋雜起我醉婆娑安君情則喜嗚呼贈袍憐  
生挂劍憐死我念朱公情何已已年踰知命雙鬢未  
絲仁厚獲齡祺未期奈何一疾而忽成悲公始抱疴  
我數問醫者雜視咸曰無危病久不痊我心則終  
憐焉計報雙淚涕洟嗚呼傷哉若古有言仁者有後  
公之芝田幸挺續秀以世其家誰云弗壽我酒盈尊

我殮伊俎縞帶素袍酬公柩所公貌蕭臞公惟慷慨  
英魂不流贍也如在哀哉上享

祭王弘宇

客春乙未再震者地客冬木妖火生神樹占史狐疑  
余嘆且喟邦人當之其在先輩俄報計音公騎斗去  
倚年獵第艾歲懸車出有民譽歸有道書不琢不彫  
若沖若虛憶昔高堂子夜清暉花籠步障香印耀綸  
燈光破玉客履連珠公倚而笑喜動髮眉退賦百咏  
似序屬余譬彼播揚前以糠粃公之憐才舉世無兩

氣誼彌敦遂成世講曉曉鵠冠蕭蕭鶴鑿樂哉東山  
抑河西爽塵尾筇頭幸隨俯仰長公次公踔立人上  
龍媒長嘶獅絃絕響草亟之鳴亦復見賞嗣余授經  
越水吳臺公亦高卧門掩蒼苔雞犬相聞不相往來  
庶幾近之彼此無猜室邇人遐跡踈心密尚擬龍門  
威瞻鳳德胡天不弔白日竟夕落梅在庭愁雲抱石  
風褰素帷淡無春色先慈弃予公更捐客生我知我  
夫朝永隔萬痛攻心百憂刺骨公有喆嗣千霄六翼  
顧予山癯報母何日念酬感懷彈泪俞碧

陳眉公集卷之十七

雲間陳繼儒仲醇著

祭文

祭王亭伯文

嗚呼一片乾坤兩丸日月送盡英雄頭白如雪更有  
吾兄未白而殞朝榮暮落槿花野困憶昔庚辰遇于  
直塘傾蓋而語得兩琳琅嗣後漸晤笑言斐亹握手  
拍肩宛焉兄弟草綠鳥啼留連觀西夕陽在樹醉咏  
而歸兩年以來蹤踪彼此青雲白雲各言爾志離贊

之園欣然斗酒爲別未幾柳生于肘嗚呼二三知己  
落落星辰疇如吾兄肝膽相親名教若掃淪胥以沉  
疇如吾兄孝友溫文所可痛者大襄未卜而有季在  
宜瞑其目所可念者遺珠在腹而舉得雄若教可續  
人如車輪生往死復月十二乘日三十輻誰久存者  
而亦何哭

祭何太老師文

相彼時雨膏沐人寰孰隆施是雲出名山相彼流泉  
以灌以溉孰委輸是源從大海吾儕小子事師有年

孰聞先是教本家傳於穆先生心古行古吾師得之  
性稟鄒魯畫地而蹈循牆而行吾師得之溫溫恭人  
早擅一經晚酬六籍吾師得之雀起鶴立誼敦老友  
澤急窮親吾師得之陽熱如焚無妄笑言無輕臧否  
吾師得之黃中通理不設城府不立藩籬吾師得之  
光明坦夷獨秉直心邁種隱德吾師得之以昌世澤  
世澤方滋草木始芽良果垂實克大厥家惟師與仲  
爰及名孫五色鳳采千里龍文花照金罍月籠玉樹  
舞袖翩翩式歌既醉爲魯霧光爲鄉祭酒樂哉未央

百歲非久何爲忽忽日迫崦嵫匝腸攻骨哀絕吾師  
凡我及門淵源道重後時舉觴忍觸師痛荒日淡淡  
寒風綏綏酸涕入地霧今來歸載翕載張彷彿舉帷  
紙錢不散通信葭灰

祭震野楊公文代

吳俗滔滔江河斯決中砥流波伏我先哲巍然三老  
公與安節袁公星隕公若曉月皤皤黃髮是咨是疇  
遙髦于荒執政之羞束帛千旌我徂維求三事夙夜  
竚公壯猷公亦幡然爲余強起司馬人龍旋還故里

屢 詔不赴眉壽燕喜占吳得歲歲曰庚子公躋大  
耋 上錫杖几使者在門酌酒及醴獻老乞言三祝  
而起德薰鄙吝身繫安危衣冠劍佩照耀里衢香山  
洛社舍公誰歸枮榆相望余擬肩隨方春壽公曾致  
厥辭酌以大斗化而爲箕人生寔難慶弔須臾嗚呼  
哀哉居鄉畏壘居官去思慎履無咎清德可師興言  
及此能不傷悲 朝樂輶奏市杵罷歛國論私情老  
淚如絲震耶綰耶宜配公祠尚饗

祭徐孟孺代

詩咏于旄易取束帛賢者之廬王侯伏軾吾求伊人  
欽君高迹南州徐稚山陽徐積稚有隱操積有孝德  
頽頽千秋君真其匹少奉慈訓適爲大儒後以慈背  
尋謝公車焚繡柩下結廬墓餘松栢蕭蕭淚與血俱  
旌母苦節成君初志君謝謁余居然處士微及性命  
耻談名利宜巢宜由不夷不惠芳蘭所生其草皆香  
美玉所積其山有光君之所止其國必良何期仙詔  
忽返帝鄉薜荔慘淡猿鶴悲傷桂劍荒楸懸榻空梁  
嗚呼哀哉吾聞古云丘園道重不爲之爲無用之用

奠君一觴非以私痛激揚清風薄俗可勵

祭徐孟孺

代

世有良驥實惟龍驤乃不騁乎康莊世有俊才實惟  
棟梁乃不構乎明堂世有隱君木之豫章馬之飛黃  
乃不遇乎匠石之與孫陽漢有孺子魏有徐偉長合  
二子以並駕蜚清名于四方如雀之起于菰蘿如鳳  
之鳴于高岡如天半朱霞之掩映如雲中白鶴之騫  
翔何期黃絹竟秘青箱少有志于金馬晚闇然而豹  
霧黛眉如月入室見姪操琴吹竽數奇蹇步畏風塵

若含沙不敢厝足于當路慨雞豚之不逮甘結廬以  
永銅泌水衡門焚香高枕偶寄興于蠹編終下捷而  
燕寢方聞龍卧忽聞蟬蛻騎箕尾而上征望玄扉而  
策轡何二暨之不遷極三尺之永崇道德之里雪消  
蘭蕙高隱之廬雨埋蓬蔚瞻仰清風孰之能繼予等  
奉司一邦欣聞高誼方于旌之在郊乃溘然而仙去  
用君家法生芻陳祭卷言詰人臨風結涕

祭王和石

代

震澤之脉蜿蜒而東匯爲婁水靈秀所鍾譬如大川

必生蛟龍蟠結人文聿生次公公與吾師兄弟師友  
節義文章千秋無偶金谿二陸眉山兩蘇求之古人  
庶幾其徒立幟麟經聯轡雁翼蕙吐蘭芬金相玉質  
含香儀部握鑑金曹斗山愈重月旦靡逃視學中州  
青標外著桃李無言善教有譽忽思初服遽爾懸車  
載壇載篋其樂何如君子道長尺一屢下縉紳拭目  
行不俟駕公乃家食堅卧如前雙枝玉樹旖旎當庭  
甫抱神駒遽殤國寶公亦隨殞徽音俱杳嗚呼樂天  
伯道莫恨無兒夜臺母子猶及見之名位壽考莫恨

早齋封樹鬱然而寢孔頑白楊瑟瑟黃日荒荒送客  
如雲幸舉一觴

祭徐金吾

公序

嗚呼人立天地何死何生生死幻夢誰殤誰彭藍縷  
草路泉釣山耕瓊居珍食楚舞秦音淡濃異饗銷落  
同塵猗與公子條猷傷心育自華胄曾祖文貞爲國  
師保顯懿曜靈袞功錫券世興禁兵大父奉常厥翁  
踐登蔚爲家裔襲爵彤庭燐燐炳炳閥閱崢嶸公子  
好豪燕市吳門高裝駿馬冠佩晶英公子好俠三都

五陵花撲玉缸揮霍黃金公子好盡劇龍陽青香飄  
九和其從如雲公子好客朱履紛紅彈碁擊劍伐鼓  
飛笙翩翩公子濁世幾人年未三十溘焉石城六朝  
紅粉縈繫遊魂昂身紫闥疇速之亨畢命黃爐疇促  
之屯露晞日影蘭敗秋聲江流雲散星殞珠沉簾虛  
夜靜風寒月冷嗚呼公子舟壑忽分入人生到此天道  
寧論丘壠纍纍松楸陰陰王侯廝隸卒歸幽冥矧公  
子今何悼之云所可悼者閨淑零丁鉏合空守獨弔  
孤燈所可悼者堂上萱椿朱顏鬢髮誰爲溫清所可

悼者嬰孩在抱呱呱弱齡所可悼者名與身逝池館  
未平嗚呼公子曷遂捐茵風流已矣靡不心憐某等  
幸叨翁誼戚友情深聞公子計潸然淚盈謹勒哀草  
敬奠淑尊惟靈來鑒惟靈來歆

祭沈石樓

代撫臺

憶昔先朝 帝重翰墨華亭二沈入侍西掖伯仲巨  
卿天寵駢錫人得片楮貴若拱璧數傳及公實世其  
澤志繩祖武才高數厄壯心無堅飲羽沒鎬卒以名  
儒脫穎通籍拜官大行飲水嚙蘖駸駸四壯每懷靡

及十年不調六月偶息氣活意銷雅忘失得望重資  
深爲邦司直直道如弦能補袞職神羊觸邪驄馬避  
跡生視玉闕風行電擊墨吏胆寒債帥股慄帝難  
厥任廷推屢格借重豫章先聲辟易衣繡鵠騶光滿  
衢陌何期中道二監見迫法星麗天隕而爲石風雪  
殘燈淒其古驛嗚呼官至侍御退若逋客仕宦稔載  
家徒四壁兒衿半青親顛已白數卷遺書寸心捧檄  
傷哉痛哉山陽短笛

祭唐抑所

嗚呼人生何嘗造物茫茫廿年事業一枕黃梁猶憶  
曩昔隨兄雁行兄僦城南桑戶葭牆蘭入束薪誰知  
國香貧有泰色咀宮嚼商寒毡濁酒語必昏黃相視  
而笑富貴無忘割玉三獻人驚夜光垂翅之翼化爲  
鳳凰錦衣東歸四牡乘黃彼其之子蒲伏道旁名位  
愈灼賓親滿堂觥籌笑語爭道吉祥顧而事我兄色  
獨莊我亦道義惟兄是匡官箴鄉譽朝典國防掀髯  
抵掌狂生不狂兄謹謝教書紳以藏旁及片語錄付  
奚囊兄之重我豈爲文章同心之言各有攸當兄有

正氣如三秋霜兄有堅守如百鍊剛兄有冷面惡圓  
喜方兄有熱腸植弱鋤強兄照當空魑魅潛藏兄魂  
升天野鬼跳梁安危所繫寧獨故鄉假兄相位度必  
見長正直忠厚造福無疆爲范仲淹爲司馬光天胡  
不仁殲此棟梁嗚呼痛哉

祭楊石間

嗚呼人孰無友心知實難寸心苟異離合多端外雖  
膠漆內實沙搏和合之玉終必破丸惟我與兄終始  
金蘭當兄未遇蠹死螢乾公車載牘屢罷春官憔悴

低迷仰屋而嘆餅罄罍耻對客損歡余時過從慰爾  
歲寒代兄教子漿藿共餐涕笑錯沓往往夜闌遠兄  
鷗貴視子金鑾故人千里峩及羽翰匡以道義母受  
世彈丸謹謝教書紳及聲吏議鄉評罕索垢瘢兩人  
名龍或飛或蟠兄無我騎我無兄千鐘鷗山林彼此  
俱安病榻之際彌覺盤桓苦言藥石余心先殫猶與  
神明相爾衰殘何期別後竟戢一棺新堂未聖素帳  
改觀氣象慘惡道路汎瀾余何人哉痛殺心酸

祭袁微之

嗟哉世不識兄沒而獻嘲我同知心反哭爲謹兄本  
丈夫氣誼甚豪凝神竹素瞠目雲霄旣綜經術旁擅  
風搔笑掇一第如劍吹毛胡期數奇造物汝驕感憤  
用壯破其寂寥脫身俠游紅樓素綃更走塞下控馬  
射雕千金垂盡寸胆難消肯傍妻孥米鹽細瑣肯向  
市兒足趙眉嫵肯握牙籌賤同上賈肯挾虫編敗如  
降虜日月朝三乾坤格五誰蛇誰龍誰鼠誰虎殞子  
彭箋等子破釜正寢旅魂終歸客土兄本達人且醉  
清酣未了之事有見能補

遙祭李知府

維侯言慈貌慈心古行古三月政成奪我李父卧轍  
攀車以義得禍借寇不能樹碑道左之子東來如見  
明府哲人云亡自辰及午今始知之山川間阻設位  
而哭絮漿藿俎萬姓傾哀同余此苦透骨清風隨車  
甘雨遺愛在民侯或瞻汝

祭歸季思

嗚呼季思初聞君名疑鬼疑仙繼得君實可聖可賢  
讀君之文煩憂以渝挹君之度鄙吝盡綱如空中雲

如澗底泉雲歸無痕旣妍以靜水流無聲旣甘且冷  
依依若親暱暱若避不衣自暖不酒亦醉一試公車  
再傳童子未能免俗聊復爾爾墓母以還遂與亾絕  
木榻一匡蘆絮百結紙窓呼風圭竇捲雪囊無剩錢  
壞無遺蔬案無退筆皮無藏書兀然一身神明與居  
誰應門者長裹髮鬚人謂君苦君神休休人謂君矯  
君行油油所資旣廉致用亦讐斯神斯命天也眉俛  
古賢不壽惟回與憲人道何缺陰陽何滲念此人亡  
顛倒五濁犬豺唁骨蟻蠅羶肉嚮爲勞避涼趨燠

誰策龜靈實槁蟬腹迎風而蛻永謝亡福清虛之府  
別有綿邈古道古辭爾先太僕俎豆其間死亦不辱  
卽死幾何遽掩蓬蔓念我母慈侍子于此棺固于身  
封甫及趾維孝維廉有吳季子

祭王逸季

一片乾坤兩丸日月迭盡英雄頭白如雪亦有吾兄  
未白而殞石火電光朝菌暮槿嗚呼痛哉余憶羽冠  
游于瑯琊兄髮覆額卓爾名家文采爛然垂雲聚霞  
覺我形穢玉樹兼葭國士見推謬得岡伯岡伯許可

兄亦動色從此漸敦笑而莫逆氣叶椒蘭誼堅金石  
歲寒之盟庶幾無斁何期壯年妖夢忽及余方病瘧  
莫獲問疾卧聞兄計驚動心骨雪涕漣漣濕枕沾席  
兄沒一年余病方起困頓支離喘息而已乃束生芻  
哭兄蒿里往歲此時幾同兄鬼未死之身奠兄一卮  
兄而有知其忍舉之兄而無知酌亦何爲我將求兄  
于延益堂素帷丹旐空爾翕張我將求兄于弇州園  
墨池書帶空爾淒煙兄竟何去上下求之塊然天地  
徒有才名士林傳譽徒有遺文蠹魚章句屈指交游

十年以內既失仲趾復奪孟孺落落辰星交游漸替  
今復哭兄逸季已矣人生幾何殫此血淚嗚呼哀哉

祭陸君羽

嗚呼君羽其遂亡耶當君羽病時則賴長公飲哺將  
護執手殷勤當其歿時則賴長公紀綱後事含歛櫬  
衾當其藁葬則賴長公鼓吹旄旌辭別國門傷哉吾  
曹病不藥死不臨除夕之辰又不能素車白馬爲君  
執縗而前行嗚呼痛哉君相岸偉修髯便腹貴宜邁  
俗而志不酬君度遲緩落落穆穆老宜後福而壽不

登六三戰三北家無脫粟一字一絹沒無尺幅人孰  
無死奪君太酷人孰無死出君太速骨雖淺土血猶  
附肉族不及送友不及哭嗚呼痛哉傷心慘目君病  
瞑眩兒死勿知君若有知尚覓見兒夜臺寂寞或笑  
或悲其今存者君可勿思君策孝友吾曹所師惟伯  
氏在衣之食之惟伯氏在教之誨之吾曹友生愛何  
能爲生死訣絕盡此一厄

祭學憲包瑞溪

嗚呼吾公竟至此耶悠悠人世其足恃耶憶昨客冬

別公言歸徘徊中庭霜月滿衣間余來馭燈以爲期  
十三之日猶勤手書何知計音旋起須臾何知永訣  
乃在河渭嗚呼哀哉知公如此恨不當時抵掌未極  
知公如此恨不在座嘔心盡出知公如此恨不同遊  
青山白石知公如此恨不徵歡朱絃錦瑟知公如此  
恨不逍遙扁舟竟日知公如此恨不笑談清燈彌夕  
嗚呼哀哉德無全福仁無全壽賓黨驚疑余哀獨疚  
孰知吾公忘年而友孰如吾公忘形而久孰如吾公  
知余不苟孰如吾公望余不朽家人國士知已感恩

乾坤落落罕見此人鍾期絕調鮑叔孤坟一腔血熱  
于行淚零何以報之歟日寸心實聞斯言賢子若孫  
其以微忱告諸恭人

此時并祭太鳴人故及

嗚呼哀哉

祭張完相

麟鳳所至其國必祥蘭蕙所直其草必香賢者所居  
其俗必良穆穆先生善蓋一鄉引繩而蹈畫地而將  
視聽無愆顰笑必莊屏去械數洞見肺腸不應名竇  
不受奔文冥行隱德可格神鬼屢上公車一官聊止  
前宿青壇其清如水家無負郭門無俗軌心無炎涼

口無臧否手一遺編以送殘晷父子相師自爲知已  
如周元公如元紫芝伊室甚邇伊人可思舉公賓筵  
三讓三推公旣避名名亦避之歲時粟帛在浚于燠  
終公之亡罕及庭廬猶幸百年永言丘壑起懦廉頑  
挽浮敦薄何圖返真竟騎遼雀其卧冰上病魔躑躅  
生芻不前我心則怍敬奠一觴告我先覺古貌古心  
宛焉如昨

祭相國王荊石

古云千人諾諾一士謗謗自余事公而始味此語之

無怍憶當乙酉公批余文疑有仙骨恨羽毛之尚薄  
時與辰玉同應南舉同罷公車辰玉有志再戰而予  
則決意乎蓬蒿丙戌辰玉別予入都予裂青衿而招  
之云盍歸乎來相與逍遙從楊許于碧落公聞而笑  
是子也不鳴不舞無乃類羊公之鶴戊子領解辰玉  
向亨予遁自若既而辰玉且譽且誹且戰且却乃寄  
書戲予爲李文靖而公亦嘆予之不爲名縛辛丑辰  
玉上第馳詔故鄉金羈玉絡公也笑迎幸衣鉢之  
有托何期冢孫云亡辰玉病劇種種衰相如青天之

忽散爲冰霞而春花之竟隕爲秋籜晚而司馬再相  
召命自洛人以爲慶予以爲愕未幾不祥之事與  
不解之詬遂彌天而大作昔者登龍今者羅雀予再  
謁門慰公寂寞餘波及之幾不免耽耽之饒嚼然而  
心本無他豪傑所覺漸久漸灼浮陰解駁而公已騎  
箕尾而游冥漠嗚呼痛哉公忠孝簡于帝心明羽  
定于備幄社稷大計非山澤之所能圖度獨其門  
無四知之金室無姬貳之樂不市恩不修郊不人才  
牢籠不名譽彫琢殘花數畦枯棋數着公自諒機心

機事之盡忘人訝公世情世法之太畧而不知者猶  
猜其退而營進坦而藏鍔老而強飮病而不藥及今  
蓋棺而果信公邯鄲之夢絕不及于平津之閣嗚呼  
冤哉嗚呼痛哉夫老臣心迹不明猶望有朝議之是  
非如昨是非不明猶望有常情之恩怨如昨恩怨不  
明猶望有天道之善惡報應如昨今天以摧殘人以  
謹誣門祚凋謝子孫卑弱三者一無憑焉豈月盈必  
虧果碩必剥咷不共笑齒不並角卽公且不能逃盛  
衰之數而幽明今古原如此之混沌而舛錯者耶帝

闇茫茫坐視爲虐鬼神憤憤似復相謔物情三變刼  
運五濁夫何言哉不如夜壑

祭朱養淳太史太孺人文代

嗚呼瑤池竹冷南岳花明爲西王母爲魏夫人或居  
靈府或掌名山各有司存孰來人間勘校霞篇檢閱  
玄籙爰擇令德爲母之鵠令德伊何實維朱母環珮  
羽毛麗于下土法彼坤儀矢其德音邊豆無梗禮儀  
有盈雪殘閉戶雨暗挑燈式穀爾後蔚爲聞人射策  
軒墀首冠多士酒渌花紅頻煩宮使玉皇香案金馬

秘書甘泉朱雁天祿青藜帝曰休哉朕居中央握機  
蹈杼運于四方監觀爾嗣充稱厥選揆考本原姆氏  
聖善何不少須爾綸爾誥輝燁自雲翩翩青鳥大壑  
蓬壺神仙所都靈爽復去其歸此乎某忝年家誼若  
兄弟豈無一杯奠于靈几酌此椒酒採此蘋花含意  
未伸雪涕如麻

祭徐長孺母王孺人文

未必有本水必有源不知其母請視子賢伊子云何  
經明行脩衡門泌水耻于諸侯有雀在羅有駒在谷

孺人曰足子生不辱有羞匪鼎有衣匪班孺人曰安  
食旨且甘嗟彼縉紳鬚眉楚楚與貧賤仇如撼猛虎  
豈意孺人而氣則吐豈意今人而心則古風雨機絲  
雪霜燈火髮若飛蓬心無荼苦方諸令儀指不再數  
黔婁之妻和靖之母採西山薇僅堪一豆酌南山酒  
僅堪一斗跪而進之爲孺人壽何不百年柳乃生肘  
青烏西歸白雲東走在南岳頭在瑤池口翩翩女真  
應與爲友儒與之子嘔肝露腸宜如昔人拜母登堂  
乃從計後竟奠空觴唱薤葉歌喪柏子香靈輿可招

來格洋洋

祭黃母太恭人文代

穆穆恭人夙閑內則曰嬪君子徽音無斁若坤代終如月繼日鳳鸞再鳴陽鳩一德入撫哲嗣不育而教旋樹婦儀遂居母道小星澤均寶婺光耀申錫自天載綸載誥伯也兩臺自日霜飛埋輪攬轡請劍執裾仲也宮詹清風穆如玉皇香案金馬秘書紫駕異殺黃封法醞鼎養實隆恩寵莫並兄弟稽首對揚明聖持此寸心以師衆正成功納屣高蹻懸車堂開

綠野花對紫薇燕喜無量鶴髮相輝風生黃扇花傍  
潘輿又有文孫書奏河渠三祝者華五福者箕惟太  
恭人而樂籩籩南山肇歌西池來詔乃馭白雲乃控  
青鳥去何之兮暮雲縹渺瑤瑟明璫遽埋寒草嗚呼  
哀哉緬惟吾師恩埒陶冶聞母之計未遑逝者子役  
此邦泣陳一聲惟靈祐之再相司馬

祭郁太夫人

古人定交如子姓行擔簦千里拜母登堂維太夫人  
若母猶母不及撫觴竟陳絮酒嗚呼哀哉吾哭夫人

微獨聞德有厥孫子爲予金石氣義節俠千玉色雲  
才鋒韜畧空千里群初以風雅頗稱同調旣披腹素  
習母陰教聞鳩治績雞鳴薦蕡相彼君子循吏儒林  
秉禮蹈義肅如朝典有穀貽孫瓜瓞斯衍燕謀奕奕  
鶴髮蕭蕭安期之棗金母之堯何不百歲或歌旣醉  
慘淡孤燈嗚呼哀哉齒踰八旬不爲不壽身閱四世  
不爲不久玉樹琅玕參差戶牖况其長者尤稱不朽  
母目已瞑母寢已甘桂花在几明月在簾蒼顏老骨

清香滿天

祭王澹生母魏夫人

我思古人交亦不易一言千秋比千昆弟拜母登堂  
起居而退儒于諸君誼亦非淺布衣之交未敘斯典  
然聞徽音母實賢媛惟莊渠公名德令聞而我淑人  
爲其女孫唯琅琊公列仙文伯而我淑人爲其元匹  
能以鵲巢贊助羔羊坤厚載物元吉黃裳再以穆木  
弘衍从庭下參差蘭芬玉苗世祿之家鮮克有禮  
而主薦繁維筐及管庶人之婦言不出里而德升聞

繪書至止剗薦給客挑燈課兒視子猶子恩斯勤斯  
駕部長君上書請告非擬冥鴻志在烏鳥婆娑綵服  
逍遙板輿爲樂未央遽爾言歸嗚呼痛哉某昔仲春  
先慈見背雞骨半枯鶻啼盡淚今聞計音感動五內  
進謁几筵泣無乾地凍雲不解春暉已斜紙錢戰風  
寒掠窓紗靈帷翕張遠耶近耶孺子酒薄侑以梅花

祭櫺李丁烈婦文

余讀嘉興柳志節婦僅兩人耳蓋歎而悲之夫禮  
義之鄉度必有奇節而爲委巷棄人婦或間史不記

國史不書式盧表墓閼如也人固有幸不幸哉丁烈  
婦端平巷中寢人婦也夫亡葬火烈婦年十七投焰  
者三父母掖之堅不死數日微聞翁將嫁之烈婦仗  
刀自剄不死傳以藥手掣之不死皮肉綴附一絲許  
號哭震裂喉斷竟死矣嗚呼異哉方烈婦之死也翁  
姑駭而走有小姑來視尸父母繫其髮尸上噪擊之  
不聽出業訟之官天暑烈婦不得歛吾友賀伯闇聞  
而義焉身詣巷中問其事事核爲解諭呼父母來釋  
小姑去凡紀綱其余擇幕旒悉無憾郡邑長與士大

夫爭爲文以祭且釀金十壤墓之烈婦非特身名不辱且不朽矣夫檇李自二百年來節婦堙滅不勝數丁烈婦年甚少家甚貧一時老稚奔走告語郡邑士大夫哀挽而表章之者獨甚著人真有幸不幸哉語云無言不讐無德不報烈婦其何以報鄉之人大抵愚夫婦之生死如飄風游塵何關聚散惟節義之精靈英爽非歿爲明神則轉爲男子將無驅厲鬼吞妖魅以清此一方民不可將知將無再世更生孝子忠臣湯火惟命不可知將無他方離吏于故鄉爲監司

郡邑長整齊綱常捍恤災患如同室之救不可知嗚呼是皆爾丁烈婦死後之責也雖然西子沼吳隨范大夫買臣妻去更嫁閩吏檇李至今羞稱之今有丁烈婦慷慨殺身以張越勁則烈婦之振檇李多矣且以丁烈婦之故里中聚談或旁引某婦某女或嫁或未嫁或死或尚未死或不及旌或待旌或貧賤格不得旌者縷縷追述其年歲日月里居并及其父母夫之姓名宛如昨日事一丁烈婦死而衆貞女烈婦皆生則烈婦之振檇李又多矣豈必徼靈于烈婦之身

後哉嗚呼深閨寡婦拭淚而施簪珥立朝大臣易姓  
而施青紫上玷丹書下汚青史彼何人哉死而死矣  
嗚呼尚饗

祭陸宮保

天有元神國有元氣儲與磅礴百福攸萃德位名壽  
雖曰合符古今疇兼惟公耦俱前茲辛丑爲士冠冕  
煌煌人文奕奕天選後茲辛丑爲國老更寵以命使  
養以大烹閱世則九閱歲實百視宰官身過神仙曆  
維公道宇岳峙淵澄維公局度月皎風清不得而親

不得而疎既遠釣餌寧挂網且不爲名尸不爲智府  
朱絃爲君玄酒爲母退也進基不考而最歷官七年  
坐致卿位虛而實用功在不刊啓沃密如寅清穆然  
六十罷官人謂太早匱而善臧不喪厥寶六十生子  
人謂太遲共保歲寒及子未衰天之福公可謂善巧  
公之承天翼翼心小偃仰林泉四十年多鬚眉皓白  
冠裳嵬峩一茗一爐三豆三爵燕居游息執事亦恪  
邦君國人負墻以趨半面爲師片語作謨間演三車  
以弼四教德返嬰兒群狎鷗鳥比聞籃筭時出近城

子孫祁祁觀者聞聞以公神王占國有慶以公寡言  
疑國則病一旦翛然乘化以歸神與尻馬杳不可追  
亦有壽者蠹爾木石維公之壽如泉淮澤霖雨之膏  
厥施一時泉深土肥百世賴之公今仙馭或駐斗旁  
騎箕再來功業詎央所嚙然者藐予後進是誨是攜  
實仰先正示何人斯敢比老彭與吾黨勉奉典刑

祭馮烈婦文

余拜檇李丁烈婦墓歸甫小憇讀易而客復有以新  
豐馮烈婦事報者余曰此一部咸恒易也夫易之咸

而必繼之以恒者何也咸爲艮先少男少女夫婦之卦也故恒之六二恒其德貞婦人吉夫子凶象曰婦入吉一而終也夫夫婦偕老最爲吉祥善事若馮烈婦二十二而自縊殉夫恐言吉哉余曰此正易之所謂恒也忠孝節義乃人道中之風雷何地篾有烈婦不幸而得恒之正耳烈婦嫁裔道貧且病病且就殉非夫子凶乎夫死于萬曆丁未五月壬申而張氏就義于六月辛丑從一而終非恒其德貞乎烈婦一死而郡人奔走告駭以爲奇非震雷象乎邑大夫與鄉

袞孝秀爭爲文若詩誅之而遠近賢媛聞之戚戚心動矣非巽風象乎雷則震動一時而風則巽入百世雷風變而恒道成矣非吉乎嗚呼此馮氏一部咸恒卦也吾曾終日講易而不知有心易易乃在婦人女子可愧也夫可愧也夫尚饗

祭餓死張烈婦文

維萬曆歲次丁未朔日癸亥陳繼儒謹以首陽之薇娥江之水致祭于明故張烈婦陳氏之靈曰吾聞古之節婦或剋面引鏡或劙耳握刀或割髮表心或截

鼻見旨非外迫豪強則內迫父母耳張茂才彌留之  
際烈婦以節許之父母不忍傷烈婦心愍然以白頭  
守節許烈婦矣豈不能須臾忍而竟死耶夫程嬰未  
死以趙氏有朔枉張世傑陸秀夫未死以宋氏有帝  
昺枉今烈婦誰倚乎有孤則保孤爲重孤無可立則  
猶夫爲重等死耳溺死畏死排墻死盜賊毒蛇猛獸  
死五日不汗死七日不穀死詎若烈婦今日之死爲  
快哉村嫗竈婢以緩死勸節婦此若以蘇屬國洪忠  
宣勸人夫屬國十九年而歸漢忠宣十八年而歸宋

要自有天幸不當與人臣道也藉今數年之內不幸  
以他故死卽不忍爲逆劉豫所留亦將爲降李陵所  
笑文信國被執就義稍緩太學生王炎午作生祭文  
以速之謄寫百篇榜之水陸通衢曰丞相欠一死耳  
今烈婦飲毒飲金繼之絕粒必從張生地下而後已  
旣不覬蘇屬國洪忠宣之生還又不待王炎午之生  
祭則烈婦之死加忠臣一等矣一死而後不辱張氏  
婦一死而後不辱陳氏女一死而九峰若首陽三泖  
若娥江使見者心膽皆慄談者齒舌俱香感激義烈

敬奠一觴非止爲閨闥勸蓋將廉頑起懦告諸男子  
慎無負七尺之鬚眉而蔑百代之綱常也嗚呼哀哉  
尚饗

再祭張烈婦文

嗚呼伯夷微仲子李蘇武雪豈不矯矯絕粒哉然而  
夷也猶寄命于微也仲也猶寄命于李也武也猶寄  
命于雪也且武則胡婦爲之左右仲有辟纁夷有叔  
齊夫婦兄第一鼓一舞烈婦粲然獨身而已有勸生  
無勸死則烈婦之不食狗夫又非伯夷以下諸君子

以同日論也嗚呼奇哉嗚呼痛哉尚饗

祭王太夫人文

時同故人徐孺子

嗚呼衆人之母賢不出里宰相之母至聞人主若賈黃中召母禁庭賦詩賜坐頒賚頻仍若張齊顏母亦八十手詔存問帝嘆福德我嘗以此壽太夫人詎子相公真社稷臣金張絕援丙魏同心外朝減樂幕餽却金無令養交而各借名務渙小羣而成大羣婉調衆心曲回睿聽陰霾忽開斗柄期正飄然拂衣假給歸省公謂東山可以長請家席未暖使者屢宣

首柄國枋召對 御前天光下霽喜動 聖顏扶母

遠來忠孝兩全 溫諭如此恩寵爲極賈張二母瞻

乎莫及相公感奮繼之以泣羽翼 帝備旋乾夾日

言路肅清邊海寧壹功成脫屣謙著循牆板輿東旋

爲樂未央何期婺宿中夜無光公稟孺慕撻拊欲傷

嗚呼有子名相有孫列仙若太夫人可以解顏辰玉

名行卓爾千古若太夫人爾氣亦吐誰無百年或計

長安素帷丹旐山霧江湍凌競雜沓千里間關唯太

夫人而寢孔甘又若潤州忽遘百憂熾炎下灼石拆

水流如問水濱而駕膠舟唯太夫人樂哉首丘儒等  
世黍通家國士見齒聞母之喪哀不能已絮酒家風  
有徐孺子梅花一枝以代湘芷

陳眉公集卷之

卷十七

七

重修忠肅于公墓記

萬曆甲寅武陵楊公以御史奉命理兩浙鹽筴下車  
武林首謁于忠肅公墓下嘆曰浙中伍大夫岳武穆  
與公鼎立而三而公祠宇如陋巷矮屋無論謁者偃  
僂凡達有如公肅儀據從出入廟中詎此一丸土能  
容數百萬風塵雲馬乎于是捐俸命仁和令喬君鳩  
聚工料式增廊之而此祠巍然遂成湖上偉觀公屬  
陳子碑而記之大抵忠臣不惜死亦不惜名不惜死  
然後有豪傑之敢不惜名然後有聖賢之尚黃河之  
排山倒海是其敢也既罷伏流地中萬三千里又能

千里一曲是其閭也昔者土木之变裕陵北狩公  
痛哭抗疏止南遷之謙召勤王之師虜擁帝至大同  
至宣府至京城下皆登城謝曰賴天地宗社之靈國  
有君矣此一見左傳楚人仗兵車執宋公以伐宋公  
子目夷令宋人應之曰吾賴社稷之神靈吾國已有  
君矣楚人知雖執宋公猶不得宋國于是釋宋公又  
一見蕭顥傳秦王逼趙王會渑池蕭顥送至境曰王  
行度道里會遇之禮畢還不過三十日三十日不還  
則請立太子為王以絕秦望又再見王旦傳契丹犯  
邊帝幸澶州旦曰十日之內未有捷報當何如帝嘿

然良久曰立皇太子三者公讀書得力處也由前言  
之公為宋之目夷由後言之公不為虧賴王旦何也  
嗚呼！茂陵三立而復廢；而海當立誰不知之公  
之識豈出王直李侃朱英下又豈出鍾同章綸下蓋  
公相時度勢有不當言有不亟言者當裕陵在虜  
義陵在儲拒父則衛蕭迎父則宋高載不可和不可  
無一而可為制虧地也此不當言也裕陵既反  
見濟薨鄭王病天人攸歸非裕陵而誰又非茂陵  
而誰明率百官朝請復辟直以遵晦待耳此不亟言  
也若徐有貞曹石奪門之奉乃變局非正局乃刦局

非遲局乃縱橫家局非社稷大臣局也或曰盍去諸  
嗚呼公何可去也公在則裕陵安而茂陵亦安  
若公諱之而公去之則南宮之銅後不將燭影斧声  
乎東宮之廢後不將宋之德昭乎公雖欲調郎王之  
兄弟而實密護吾君之父子乃知固鑿公功也其他  
日得以復辟公功也復儲立公功也人能見所見而  
不能見所不見能見者豪杰之敢不見者聖賢之間  
敢于任死而祠于暴名公真古大臣之用心也哉竊  
嘗謂裕陵之迺國高皇帝不殺元順帝之報也  
天生子忠肅以衛社稷高皇帝廟祀余闕之報也

然忠肅以讒死報何居夫使公功成身退老死故鄉  
六郭汾陽李西平寺耳觸鏃三泣賜而胥濤泣風波  
之獄構而武穆名<sub>官</sub>尊迎立外藩之冤酷而于墓憐公至

是一腔熱血始真有洒處矣迄今湖山之上古冢纍  
纍身死名滅不可勝計而東西往來于公之廟門者  
登故壘掃枯松糞樵牧哭英雄又非獨侍御移公一  
人而已特侍御倡俸修墓表勅櫨宇垂百年餘而表  
章忠貞之典始備是不可以無記公名鶴武陵人其  
奉命協修者仁和令高時敏上海人督工業：制得

並書

蘇黃題跋小序

題跋文章家之短兵也鉢底有綈龍鞍鞋脚下有劣虎非肇其神通者未暇辨此董道黃長虛以辨博勝陸放翁洪覺乾以韻致勝皆不解書画雖批駁萬狀而痛癢尚隔一層惟蘇黃乃具天眼耳余嘗見廬山空書卷後有李龍眠所画山谷及蘇氏兄弟像山谷骨面道立故蠅言微動皆有規檢類其為人東坡散鬚而喜氣搏掬使智愚賢不肖皆可近黃如秀鉄面非法不言蘇如灰袋道士張口如箕而五臟悉露此神仙中之文人非文人中之神仙也蘇黃之妙最妙

於題跋其次尺牘其次詞題跋鮮有合刻者合之自  
侍御楊公殆若更取蘇黃之詞而並行之或焚小宗  
香手書數行或攜取雲捲于紗籠間緩歌一二十闋  
使後世知元祐碑中有此風流黨人亦足為童榮筆  
一洗眼也故并識題跋之後而請之

蘇長公集選叙

自古五百年得名世易得文人難即所謂名世夫亦待文人而名者也乾德丁卯五星聚奎寶儀指為天啓文名之兆而余惟長公足以當之古今文章大家以百數語及長公自學士大夫以至販夫竈婦天子太后以及重譯百蠻之長誰不知有東坡其人已往而其神日新其行日益遠則千古一人而已史稱孝武之時允儒雅篤行質直滑稽協律出使詞臣名將雲蒸霞蔚於其庭漢世得人於是為盛此帝王易為豪耳若長公起自西裔中更擴竄流落於蜃塢獠洞

之間出入掉弄於悍相獄吏刀筆之手竟不能以身  
免而其所遭人文之盛實可興漢武比隆長公以文  
安先生為之父文定為之弟先輩則韓范富歐蜀公  
溫公後輩則秦黃張晁四學士以朝雲琴操為達生  
友以元章伯時與可為書畫友以趙德麟王晉卿為  
賞鑑友以參寥辯才了元為禪友以葆光塞道士為  
長生友即有懸而與之角者非理學之正叔則絅術  
之介甫而天地之人文至此極矣人文湊合如五星  
相聚而長公以奎璧之精臨之諸君子而當長公不  
得五色相宣長公而當諸君子亦不得不入面受敵

三鼓而氣不來百戰而兵益勁此天授亦人力也微  
至于風流調笑太至於悲難死生非惟不足為公困  
而反足以為公文章翰墨之助鐵之鎔而為金也乳  
之出而為酪也市人之驅而戰竹頭木屑之羅而為  
用也惟長公能之即老泉賴濱不能也故曰古今文  
人一人而已蘭亭不入帖李杜不入選無可選也長  
公集亦然如欲選長公之集宜拈其短而雋異者置  
前其論策封事多至數萬言為經生之恒誦習者稍  
後之如讀佛藏者先讀阿含小品而後徐及於五千  
四十八卷未晚也此讀長公集法也楚中陳元植其

選法先得我心矣是故眉道人樂取檢定而序之